

1 PEDRO

Puráka'aloji Pedro wakára'akare Jesucristo ja'apiyá jema'ajéñojlo marí

1 ¹Jesucristo wakára'akarena riyukuna i'imajé nakiyana Pedro i'imaká. Riká lana'arí Jesucristo ja'apiyá jema'ajeño, ajopana te'eré nakojé i'ijnakáñojlo, marí ke: Re inakiyana Ponto e, Galacia e, Capadocia te'eré e, Asia te'eré e, eyá Bitinia te'eré nakú. ²Kaja Tupana i'iwapá rijluwa i'imaká, júpimi ripechu nakú ri'imaká ke. Ra'á ijló Ripechu i'imaká, jema'akáloje ra'apiyá penaje. Jesucristo taka'aká wachaya i'imaká wakajé, kajrú rira i'ijnaká itapuwa aphumi chiyá. Ilé ke Tupana wajaka ri'imaká wapumí chojé, raú we'emakáloje unká japi la'alaño pu'uwaré ke rijló. Eko i'imá palá wani ilérowa pajwa'atéchaka Tupana palamane.

Je'echú chu i'imajíkaño yukuna marí

³Wapura'achó palá wani Tupana, wawakára'ajeri Jesucristo jara'apá nakú, riwe'epíkale wamu'ují. Jesucristo makápo'oko piño i'imaká aú, ra'á wajló wajé i'imakaje. Riká la'arí kaphí wapechu wajló, wawe'epíkale ñaké kaja rimakápo'otajika weká. ⁴Raú wawe'epí ra'ajé kaja wajló nakaje rilamá'atakare wapé je'echú chu. Nakaje rilamá'atakare wajló unká kapichálajo, unká kaja pu'uwaré kaje i'imalá re. Ñakeja wani nakaje i'imajika palá rewá. ⁵Kaphí ipechu i'imakale Tupana chojé, ra'á rinakojó iká, piyukeja la'ajeri ri'imakale. Ri'imatá kaja iká kapichákajo liyá, júpimi ripechu nakú ri'imaká ke. Ñakele ri'imajé ijló ñaké, kaja penaje eja'awá iphájika rená chojé wakajé.

⁶Ilé ke nakaje i'imajíkale ijló, ipechu i'imá pu'ují riwe'epíkana aú. Apú eyá ke amájika chapú kaje yajwé, e'iyonaja ipechu i'imá pu'ují. ⁷Nata'aká oro (uwiru) kera'athani aú, nawe'epíkaloje oro wánika riká penaje, pu'uwareni re'iyá i'imakare jácho'okoloje, nakupákaloje riká re'iyayá penaje. Ke kaja Tupana atá'aka weká chapú kaje yajwé amákana aú, ramákaloje kewaka wánika

kaphí wapechu richojé. Kaphí péchuruna richojé ña'año panaku piyukeja chapú kajé yajwé namákare, raú oro wemí chaje palaka neká Tupánajlo. Ilé ke ratá'ajika rijwa'atéjena, raú riwe'epíkaloje mékajenaka kewaka wani kaphí péchuruna richojé. Neká nakú rila'ajé palá, Jesucristo iphájika majó wakajé.

⁸Kajrú wani iwátaka Jesucristo, unká jo'ó amala riká e'iyonaja; kaphí ipechu richojé, unká amala riká e'iyonaja. Pu'ují wani ipechu rinaku, e'iyonaja unká wani puráka'aloji i'imalá, imakáloje rijló rinaku ñaké. ⁹Pu'ují ipechu, iwe'epíkale Tupana i'imatájika iká kapichákajo liyá.

¹⁰Kajrú Tupana puráka'alo ja'apátajeño michuna jewíña'ako mékeka Tupana i'imatájika ina'uké kapichákajo liyá nakú i'imaká. Napura'ó kaja naka Tupana a'ajika ripalamane aú i'imakáñojlo.

¹¹Unká chiyó Jesucristo iphá majó i'imaká, rewíña'atake Ripechu aú ripuráka'alo ja'apátajeño michuna, nawe'epíkaloje mékeka rijña'ajika chapú kaje yajwé panaku, eyá mékeka palá wani ri'imajika rijló rejomi. Nawátake kaja we'epíkana na ina'ukeka ri'imaká, eyá na wakajeka nakaje rimakare nakú i'imajika nakojé.

¹²Tupana Pechu a'arí najló pu'uwaká, nawe'epíkaloje unká najlúwaja kalé ne'emaké ripuráka'alo yukuna. Ajopánajlo penaje ne'emaké riyukuna, ñakele napuráka'alomi yuró wajló penaje. Tupana wakára'ari Ripechu je'echú chiyá cha'apá ina'ukena e'iyajé i'imaká. Neká penájemi ja'apátaño mékeka Tupana i'imataka ina'uké kapichákajo liyá yukuna. Palani riyukuna. Rijwa'atéjena, je'echú chiyájena, wátaño kaja rinakojé we'epíkana. ¹³Ñakele i'ijnatá ipéchuwa palá nakaje ila'ajíkare nakú, ila'akáloje palá raú. Ila'á kaphí ipéchuwa, Tupana la'ajíkale inaku palá wani Jesucristo iphájika majó wakajé.

Tupana wátaka we'emaká palá i'imakaño yukuna marí

¹⁴Tupana yaní i'imakale, jema'á palá ra'apiyá. Ñakele ila'aniña nakaje pu'uaré, júpimi ila'ajika, unká chiyó iwe'epí Tupana nakojé, ke. ¹⁵Lanakiya, i'imá chuwa palá la'akaná nakú, Tupana unká la'alá pu'uaré wa'atéjena i'imakale. ¹⁶Ripuráka'alo kemari: "I'imá palá la'akaná nakú, palá la'ajerí wani nu'umakale".

¹⁷Rejenowaja Tupana kemájika wanaku mékeka rijló nakaje wala'akare i'imaká. Mékeka wala'aká rijló nakaje i'imaká lokópa'ala rila'ajé wanaku palá ka'ajná, chapú ka'ajná. Ñakele imájika ee rinaku: "Wara'apá riká", ke, iphá ra'apí, marí eja'awá chu i'imajika ketana. ¹⁸Kaja iwe'epí Tupana i'imataka iká pajlakaje puráka'aloji, ichi'iná michuna kemájikare nakú ijlo i'imaká, liyá.

Ñakele unká na penaje napuráka'alomi i'imalá chuwa. Kajrú Jesucristo a'aká iwemí i'imaká, ri'imatákaloje iká kapichákajo liyá. Unká ra'alá iwemí nakaje mapeja kapichako: oro, plata, kaje aú. ¹⁹Jesucristo a'arí we'ematakana wemí rira, i'ijnakare itapuwa aphumi chiyá nenoka ri'imaká wakajé, aú. Riká nenó pu'uwaré wala'akare chaya, unká rila'alá pu'uwaré i'imaká e'iyonaja. ²⁰Unká chiyó Tupana keño'ota eja'awá i'imaká, rimá Jesucristo nakú i'imaká, ritaka'akáloje ina'uké chaya penaje. Kaja riphá majó i'imaká, rila'akáloje inaku palá wani penaje. ²¹Jesucristo, Tupana makápo'otakare i'imaká penájemi, palamane aú jema'á palá Tupana ja'apiyá i'imaká. Ripalamane kaja ipechu kaphí Tupana chojé. Nakaje rimakare nakú ijló i'imajeri ñaké.

²²A'akale inakojó kewákaje puráka'aloji aú, ika'á inakiyó pu'uwaré kaje ipechu nakú i'imakare, i'imakáloje palá péchuruna penaje. Ñakele iwata chuwa íki'ija ajopana Jesucristo ja'apiyá jema'ajeño. Numá piño ijló, iwátakaloje íki'ija pekowáaka piyukeja ipechu aú, nakaje ila'akare aú wa'ató. ²³Chuwa, wajé péchuruna iká, Tupana le'ejena i'imakale. Ripuráka'alo a'akana inakojó aú, riyani iká. Unká tajnákajo penaje kalé Tupana, ñakele unká tajnákajo penaje kaja kalé i'imajika. ²⁴Tupana puráka'alo kemari ina'uké nakú:

“Meketánaja jimichi i'imaká, rejomi rimeríya'o.

Ñaké kaja riwí, meketánaja riká, rejomi riwijíño'o.

Rejomi rikujrúka'ato piyuke.

Ñaké kaja piyukeja nakaje ina'uké la'akare i'imajika meketánaja.

²⁵Eyá Tupana puráka'alo, unká ñaké kalé.

Ñakeja wani ri'imajika matajnako”.

Piyukeja Tupana puráka'alo, rimakare nakú i'imaká, wanakiyana ja'apata ijló, jema'akáloje ra'apiyá penaje. Ñakele jema'akale ra'apiyá, i'imajé matajnako je'echú chu ripalamane.

2 ¹Ñakele iyurí iliyó piyukeja pu'uwaré la'akaná; iyurí kaja iliyó ajopana wa'até pajlakana. Ila'aniña kaja inakuwá mapeja palájne'ekena ke ajopánajlo, napechu i'imakáloje palá inaku penaje. Iwó i'imaniña kaja chapú ajopana cha, nachá'atakale ka'ajná iká nakaje aú; iyurí iliyó ajopana nakú chapújra'akano. ²⁻³Kakáme'e yuwaná, wajé motho'okaño, chu'uchú i'irakana nakú. Ñaké kaja i'imá kakáme'e Tupana puráka'alo nakojé we'epíkana nakú richaje, richaje ke, ila'akáloje palá i'imajika je'echú chu ejená. Kaja iwe'epí mékeka Tupana la'aká inaku palá wani, ñakele a'á wechi Ripuráka'alo inakojó.

4-5 Kajmuchaji a'ajeri Jesucristo. Unká ina'uké wátala ri'imaká, e'iyonaja Tupana i'iwapá ri'imaká rijluwa, ajopana chaje wani ri'imakale. Chuwa Jesucristo wa'atéjena iká; ra'á ijlo Ripechu i'imaká, ripalamane aú i'imakáloje matajnako rijwa'até je'echú chu. Iyurí ichó Tupánajlo, jema'akáloje Ripechu ja'apiyá, ila'akáloje riwátaka ke penaje. Jesucristo a'arí iñathé, ila'akáloje nakaje palá Tupánajlo, ñaké kaja ina'ukejlo, raú palá Ripechu i'imajika nakaje ila'ajíkare nakú. 6 Tupana puráka'alo lana'akéjami kemari Jesucristo nakú:

“Nu'uwapajé ina'uké e'iyayá pajluwaja, ajopana chaje i'imakare,

ripalamane ajopana i'imakáloje palá penaje.

Jerusalén ejo nuwakára'aje riká.

Kaphí pechu i'imajika richojé, unká wani pechu la'alajo ujwí riliyá”,

ke Tupana kemaká rinaku i'imaká.

7Iká, kaphí péchuruna Jesucristo chojejlo, ajopana chaje wani riká. Eyá unká jema'alaño ra'apiyajlo, Ripuráka'alo kemaká rinaku i'imaká, keja riká najló. Rimá rinaku i'imaká:

“Unká wani nawátalaje riká, ajopana chaje i'imakare, e'iyonaja riká, unká nawátalare i'imaká penájemi, i'imajeri piyukeja wani ina'ukena chaje, richojeja kalé ne'emajé palá”,

ke rimaká Jesucristo nakú.

8Tupana puráka'alo kemari kaja:

“Unká wani wátalajeño riká, la'ajeño chapú wani.

Riwajaje neká, unká pachá nema'alaje Ripuráka'alo ja'apiyá”.

Ilé ke ri'imajika najló, unká pachá na'alá nanakojó

Ripuráka'alo. Kaja ñaké Tupana pechu nakú nala'akana i'imaká, ke rimaká nanaku.

9Eyá iká, pajluwa yaní keja pajwa'atéchaka, Tupana i'iwapakale rijluwa i'imaká. Nakele chuwa unká pu'uwaré la'ajeño kalé iká, rile'ejena i'imakale. Ri'iwapá iká, ilamá'atakaloje puráka'aloji ina'uké chaya rijwa'até; ri'iwapá kaja iká, i'imakáloje palá wani Tupana la'aká ina'uké yukuna ajopánajlo. Ri'imatá iká mapéjari puráka'aloji liyá, i'imakáloje kewákaje puráka'aloji ja'apiyá. 10Júpimi unká rile'ejena kalé i'imaká, eyá chuwa rile'ejena iká. Unká chiyó i'imá rile'ejena, unká na we'epike imu'ují i'imajika. Eyá chuwa Tupana we'epika imu'ují, rile'ejena i'imakale.

11Nojena, íki'ija nuwátakarena, unká iñakajela wani kalé marí te'erí; ajopana te'eré eyájena keja iká rinaku meketánaja.

Ñakele iyuríniña pu'uwaré la'akaná a'aká ime'é rijluwa, ila'akáloje pu'uwaré ipechu keja. ¹²Ila'á palá ina'uké e'iyowá, raú pura'año inaku pu'uwaré: “Unká ina'ukélaruna ta pi neká”, ke, amájeño ila'aká palá ne'iyowá. Akijñojo Tupana kemaje mékeka rijló nakaje, wala'akare marí eja'awá chu we'emaká ketana i'imaká. Riwakajé nawe'epeje palá nakaje ila'akare nakojé, raú napura'ajó kaja palá Tupana nakú.

¹³Palá ri'imakáloje Tupana nakú, jema'á palá piyukeja iwakára'ajeño ja'apiyá. ¹⁴Nachaje wakára'aka wakára'ari ra'apiyá wakára'ajeño wajaka unká ina'ukélaruna. Riwakára'a kaja ra'apiyatéjena la'aká palá, palá la'akaño nakú. ¹⁵Tupana wátari kaja ila'aká palá nakaje, mapechúruna ke i'imakaño pura'akó piyá inaku pu'uwaré.

¹⁶Kaja Tupana i'imatá iká pajlakaje puráka'aloji chiyá, ila'akáloje piyukeja nakaje palá riwátaka ke. Ñakele ila'aniña pu'uwaré, Tupana wa'até jápajeño i'imakale. ¹⁷Iphá piyukeja ina'ukena ja'apí; iwata kaja íki'ija ajopana Jesucristo ja'apiyá jema'ajeño; iphá kaja kajrú wani Tupana ja'apí. Wakára'ari iká marí te'erí nakú ja'apí, iphá kaja.

Chapú kaje yajwé ña'akana panaku yukuna marí

¹⁸Iká, ajopana wa'até jápajeñojlo numá: Jema'á ikariwátena ja'apiyá palá; iphá kaja na'apí. Iphaka palájne'ekena ikariwátena ja'apí, ke kaja iphá ikariwátena chapújne'ekena ja'apí. ¹⁹Apala ijña'ano panaku chapú kaje yajwé mapeja, ila'akale palá Tupana wátaka ke. Palá rila'ajika inaku, ilé ke ila'akale. ²⁰Eyá nawajákachu iká unká paala ila'akare pachá, unká meke la'ajé ipechu i'imalajla inakuwá: “Wajña'áreja panaku chapú kaje yajwé”, ke. Eyá ijña'akachu chapú kaje yajwé panaku, palá ila'aká e'iyonaja, palani Tupánajlo ilé ke ila'akare i'imajika. ²¹Ilé kaje penaje Tupana i'iwapá rijluwa i'imaká ajopana ina'ukena e'iyayá. Jesucristo ña'arí chapú kaje yajwé panaku ichaya i'imaká, raú ramata iká chapú kaje yajwé ña'akana panaku aú, ijña'akáloje ñaké kaja riká panaku.

²²Unká wani Jesucristo la'alá pu'uwaré i'imaká, unká kaja ripajlake na wa'até. ²³E'iyonaja pu'uwaré wani napura'akó rinaku, unká kalé rakha'aké ne'emajika ilé kaje pachá. Kajrú wani nala'aká ri'imaká chapú, e'iyonaja unká ripura'aló ríle'ejé jakumi nakú. Lanakiya riyurí ne'emaká piyukeja Tupánajlo, riká we'epíkale palá nanaku kemakana mékeka nala'akana i'imajika. ²⁴Jesucristo ña'arí panaku wachaya chapú kaje yajwé, pu'uwaré

wala'akare pachá. Wapumí chojé ritaka'á a'awaná apiyákakanami nakojé, wayuríkaloje raú waliyó pu'uwaré la'akaná, raú we'emakáloje palá la'akaná nakuja. Ilé kaje aú we'emaó Tupana wajájika weká liyá. ²⁵Kapichájeño penájena i'imakajla, e'iyonaja kaja i'imaó chuwa, i'imakáloje Jesucristo ja'apiyá jema'ajeño penaje. Riká a'arí iká rinakojó, ipechu wa'aphé ri'imakale.

Marí ke wá'akajeñomi i'imajika palá pajwa'atéchaka

3 ¹Ñaké kaja iká, inaana wá'akajeñomi, i'imajika. Jema'á palá iyajná ja'apiyá. Apala raú neká, unká jema'alaño Tupana ja'apiyá, jema'ajé kaja ra'apiyá, namájikale palá wani i'imaká pajwa'atéchaka. Palá ila'ajíkare aú, jewíña'atajikale neká, palá kaja iphákale pa'apíchaka. ²Namájika aú palá ila'aká Tupana ja'apiyá jema'akana aú, ñaké kaja nephájika ra'apí. ³Ilamá'ataniña kaja ikó palá kajrú nakaje aú paláruna ke, ajopana amákaloje iká penaje; ja'taniña kaja iwilá palá; a'aniña kaja iwilá e'iyajé kawemí nojé rípatajona; akúwa'ataniña kaja inakuwá kajrú nakaje kawemí nojé, ñaké kaja a'arumakaji kawemí nojé kaje. ⁴Lanakiya ilamá'ata ipechu palá wani, i'imakáloje palá péchuruna penaje. Riká paláchaji unká wani kapichálajo inakiyá, mana'ija kaja i'imajika; riká paláchaji palani wani Tupánajlo. ⁵Ñaké kaja ajopana inaana, ipiyá i'imakaño michuna, we'epíjika natukumó napéchuwaja lamá'atakana palá Tupánajlo, palá la'ajeño ne'emakáloje penaje. Kaphí napechu i'imajíkale Tupana chojé, nephake kaja naluna ja'apí. ⁶Palá Sara micholo jema'ajika ruyajná Abraham michú ja'apiyá, raú rumaké rinaku: “Nuwakára'ajeri riká”, ke. Palá la'ajeyo ru'umaká, ñakele unká ru'umaké kero'okajo nakú. Ñaké ila'ajika ee, i'imajé rulakénami nakiyana ke.

⁷Eyá iká, achiñana wá'akajeñomijlo, numá, i'imakáloje palá kapechú iyajalo wa'até. Na'apí iphákana lokópa'ala iphá na'apí. Matejmúruna kemachi inaana, ñakele unká paala iphaka ja'apiwá najló. Tupana we'epika imu'ují, ke kaja riwe'epika namu'ují rejenowaja. Ñakele rejenowaja i'imatájika ikó kapichákajo liyá, i'imakáloje matajnako rijwa'até penaje. I'imá palá pajwa'atéchaka, ipechu kawíla'ako piyá ipura'ajiko Tupana wa'até kewá.

Nala'aká chapú palá la'akaño yukuna marí

⁸Palá i'imá pajwa'atéchaka pu'ují ipechu ke; iwe'epí kaja pamu'ujíchaka; iwata kaja íki'ija pekowáaka, pajluwa yaní waja i'imakale. Palájne'ekena i'imá pajwa'atéchaka; ila'aniña inakuwá kajrú we'epíkaño ke. ⁹Nala'ajika ee iká chapú, ila'aniña kaja

inakojo neká ñaké. Napura'ajiko ee pu'uaré inaku, ipura'aniño kaja nanaku ñaké. Lanakiya ipura'ó palá wani nanaku, Tupana i'iwapakale iká rijluwa, riwátakale piyukeja nakú la'akana palá.

¹⁰Tupana puráka'alo kemari ina'uké nakú:

“Wátajeri palá keyajupa i'imakana, amaré rikó palá,
ripura'akó piyá mapeja pu'uaré ajopana nakú,
ripajlaka piyá kaja mapeja.

¹¹Riyureje kaja pu'uaré la'akaná, rila'akáloje palá penaje.

Palá pajwa'atéchaka i'imakánaja riwe'epeje ritukumó.

¹²Palá Tupana a'aká rinakojó palá la'akaño.

Palá kaja ra'aká rinakojó napuráka'alo, napura'akó kewá rijwa'até.

Eyá pu'uaré la'ajeño wa'até, unká ñaké kalé riká,
unká riwátala nala'aká pu'uaré”,

ke rimaká. ¹³Palá la'akaná nakuja i'imajika ee, ¿meke chi ajopana la'akajla iká? ¹⁴Palá la'ajeño i'imaká e'iyonaja, amaje chapú kaje yajwé apú eyá ke, e'iyonaja ipechu i'imá palá raú. Ikeron'iño na piyá; iwe'epíniña kaja ijluwa. ¹⁵Iphá Jesucristo ja'apija; iyurí ichó rijló, ri'imakáloje iwakára'ajeri wani penaje. I'ijnatá ipéchuwa mékeka imájika ajopánajlo rinaku, nemájika ee ijlo: “¿Naje ilé ke ipechu Jesucristo nakú?” ¹⁶Ila'aniña inakuwá kajrú najló, i'imajika najló riyukuna kewá. Iphá na'apí. Palá ipechu ke i'imá najló riyukuna, raú pura'año pu'uaré inaku, jema'akale Jesucristo ja'apiyá, apáña'ajo napuráka'alo ja'apí.

¹⁷Nala'akachu iká chapú, palá ila'akare jimaje, palani ijlo ñaké ila'akana i'imajika. Tupana wátajika ee nala'aká iká ilé ke, palani ri'imajika ijlo. Eyá iná amákachu chapú kaje yajwé pu'uaré iná la'akare jimaje, ilé unká wani paala i'imajika.

¹⁸Jesucristo amari chapú kaje yajwé, pu'uaré wala'akare pachá. Pajlúwamaja ritaka'aká wachaya i'imaká, raú ja ri'imatá we'emaká pu'uaré wala'akare liyá. Palájne'eke wani ri'imaká, e'iyonaja ramá chapú kaje yajwé pu'uaré wala'akare pachá, ripalamane we'emakáloje Tupana wa'até. Ina'uké ke ri'imaká aú ritaka'á i'imaká, e'iyonaja Tupana Pechu palamane aú rimakápo'o piño i'imaká. ¹⁹Unká chiyó rimakápo'o i'imaká, ri'ijná ajopana péchumi patakéjanami ke i'imakáñojlo Tupana yukuna i'imajé.

²⁰Júpimi eja'awá chu i'imakaño michuna péchumi ne'emaká. Noé michú i'imaká wakajé, ri'imaké najló Tupana puráka'alo yukuna. Unká nema'aké ra'apiyá, e'iyonaja Tupana ña'á ne'emaká panaku, Noé ñapátaka wapuru la'akana ketana, richojé mekeleja ina'ukena i'imakóloje juni liyá. Weji ke kuwá'ata keleja (8) ne'emaká i'imaño

juni liyá riwakajé, wapuru chu ne'emakale. ²¹Neká unká juni kapichátala i'imaká, wapuru chu ne'emakale ne'emaó kapichákajo liyá. Tupana i'imatákarena kapichákajo liyá nala'á bautizar, nemakale rijló, rika'akáloje napechu nakiyá pu'uwaré nala'akare. Jesucristo makápo'okole piño i'imaká aú, iná i'imaó kapichákajo liyá. ²²Rimakápo'oko i'imaká ejomi, rácho'o je'echú chojé, re riká Tupana awa'á me'etení. Jesucristo ja'apiyá waja piyuke Tupana wa'atéjena, je'echú chiyájena, nawakára'ajeño wa'até. Piyukeja wakára'ajeri riká re.

4 ¹⁻²Kajrú Jesucristo ña'aká chapú kaje yajwé panaku marí eja'awá chu ri'imaká wakajé, ñakele ila'á kaphí ipéchuwa, ijña'akáloje chapú kaje yajwé panaku. Ña'arí chapú kaje yajwé panaku, yuriri kaja riliyó pu'uwaré la'akaná, ri'imakáloje marí eja'awá chu Tupana wátaka ke la'akana nakú. Raú unká rila'alaje pu'uwaré ripechu keja. ³Iká la'akeño pu'uwaré i'imajika, unká jema'alaño Tupana ja'apiyá la'ajika ke kaja. Ke'iyapejé nakaje pu'uwaré la'akaná nakú i'imaké; pu'uwaré kaja i'ijnatájika ipéchuwa; imanáicho la'akana ajopana wa'até nakuja i'ijnatake ipéchuwa. Yuwéra'akajo nakuja i'imaké riwakajé; i'ijnaké kaja nakajmóka'alo ejo, kajrú mureji kaja mejé i'imajíkare ejo. Iphake kaja nakaje jenami ja'apí; nakaje unká wani Tupana wátalare la'akana nakú i'imaké. ⁴Eyá chuwa, kaja unká ila'alá ñaké najwa'até pu'uwaré, raú apú ke napechu inaku, raú napura'ó kaja inaku pu'uwaré. ⁵Piyukeja Tupana kemájika nanaku mékeka rijló nakaje nala'akare i'imaká. Kaja taka'akaño, eyá kajmuruna i'imakaño nakú wa'ató, rimaje mékeka rijló nakaje nala'akare i'imaká. ⁶Ina'ukena, kaja taka'akaño, jema'año kaja Tupana i'imataka ina'uké kapichákajo liyá yukuna i'imaká. Ra'apiyá jema'ajeño i'imajeño matajnako je'echú chu. Re napechu re jo'ó kaja, nanapónaja kalé kapicharo i'imaká.

⁷Yewíchaja riphaka rená chojé, nakaje marí eja'awá chu i'imakare kapichákolaje piyukeja, ñakele i'imá palá la'akaná nakuja. Tupana wa'até pura'akánoja iwe'epí itukumó. ⁸Apú nakaje chaje ila'á marí ke: Iwata íki'ija pekowáaka; amó nachaje nala'ajika iká pu'uwaré ke pe liyá. ⁹I'imá palá pajwa'atéchaka; a'atá iphájeño inaku iñakaré chojé; ipura'aniño pu'uwaré panakuwáaka; ¹⁰ila'á piyuke palá, péchuji Tupana a'akare ijló ja'apiyá. Ñakele riwakára'aka ke a'aká palá pañathéchaka, ripalamane iwe'epíkale rila'akana. ¹¹Ñakele i'imajeri Tupana yukuna, i'imaré riyukuna palá, rikó japi Tupana i'imaká riyukúnawa ke. Eyá a'ajeri ka'ajná ajopana ñathé, a'aré nañathé

pu'ují ripechu ke, Tupana a'akale riñathé rila'akana aú. Piyukeja nakaje ila'ajíkare, ila'á palá, raú piyukeja iphákaloje Tupana ja'apí Jesucristo palamane aú. Ñakeja wani ri'imajika palá la'akaná nakú, piyukeja wani la'ajerí ri'imakale. Ñaké riká.

Pu'ují napechu ke Jesucristo ja'apiyá jema'ajeño ña'aká chapú kaje yajwé panaku yukuna marí

¹²Nojena, íki'ija nuwátakarena, ipechu kechíra'aniño ijló Tupana atá'ajika wakajé iká chapú kaje yajwé amákana aú. Ipechu i'imaniña inakuwá: “Unká ko ñaké kalé ajopana amaka chapú kaje yajwé”, ke. ¹³Amájika wakajé chapú kaje yajwé, ila'á pu'ují ipéchuwa, ijña'akale panaku chapú kaje yajwé, Jesucristo ña'aká panaku ri'imaká ke. Raú ipechu i'imajé pu'ují wani, majó riphájika piño wakajé, amájikale palá wani riká riwakajé. ¹⁴Palá kaja ipechu i'imá ajopana pura'ajiko ee inaku pu'uwaré, jema'akale Jesucristo ja'apiyá, ñakeja wani Tupana, piyukeja wani la'ajerí Pechu i'imakale ijwa'até. ¹⁵⁻¹⁶Apala pajluwa inakiyana ka'ajná amájeri chapú kaje yajwé, unká ina'uké nójeri kalé ri'imaká e'iyonaja; unká kaja jata'akachi kalé ri'imaká e'iyonaja; unká kaja ajopana nakú kulákatajero kalé ri'imaká e'iyonaja. Iká amájika ee chapú kaje yajwé, Jesucristo ja'apiyá jema'ajeño i'imakale, palani ijló ñaké ri'imajika. Apáña'aniño ja'apiwá raú; ipura'ó palá Tupana nakú, rijwa'atéjena i'imakale.

¹⁷Kaja riphá weká, Tupana ja'apiyá jema'ajeñojlo rená chojé, Tupana kemakáloje wanaku mékeka rijló nakaje wala'akare i'imaká. Palá ka'ajná wema'aká ra'apiyá, e'iyonaja rikeño'ojé wanaku kemakana mékeka rijló nakaje wala'akare i'imaká. Chaje wani ka'ajná ri'imajika chapú, unká wani a'alaño Tupana i'imataka ina'uké kapichákajo liyá yukuna nanakojojlo. ¹⁸Ripuráka'alo lana'akéjami nakiyana kemari: “Chapú kaje yajwé amákana aú wa'ató Tupana i'imatá palá la'akaño, kaphí richojé péchuruna kapichákajo liyá. Eyá pu'uwaré la'ajeño, unká wani meke la'ajé ri'imatálaje”, ke rimaká. ¹⁹Ñakele ña'año panaku chapú kaje yajwé, Tupana wátaka ke, we'epiño natukumó palá la'akanaja. Nayurí napechu rijló, riká keño'ótakale ne'emaká. Rimaká nakaje nakú keja la'ajerí riká.

Nenakú la'akana yukuna marí

5 ¹Me'etení nuwata Jesucristo ja'apiyá jema'ajeño wakára'ajeño jenakú la'akana. Neká ke kaja nuká, ra'apiyá jema'ajeño wakára'ajerí. Nomá mékeka Jesucristo ña'aká kajrú

wani chapú kaje yajwé panaku i'imaká. Palá wani Tupana la'ajika ra'apiyá jema'ajeño nakú ripa'ajiko majó wakajé. Nu'umajé kaja najwa'até riwakajé. ²A'á palá inakojó Tupana ja'apiyá jema'ajeño amákarena me'etení. Ila'á wechi ijápaka'ala Tupana wátaka ke. Unká liñeru chaya kalé amá neká; palá ipechu ke ijápaka.

³Ila'aniña kaja inakuwá piyukeja amákarenajlo, nawakára'ajeño ke wani. Amata neká palá la'akaná aú, nala'akáloje ila'aká ke kaja. ⁴Ñaké ila'ajika ee, wamájeri wani a'ajé ijlo riwemí, majó riphájika wakajé. Riwakajé ra'ajé ijlo palá ila'akare wemí; unká wani ripalamane tajnáñaalaje.

⁵Marí puráka'aloji walijímanajlo, ináyanajlo wa'até: Jema'á palá piyukeja Tupana ja'apiyá jema'ajeño wakára'ajeño ja'apiyá; iphá pa'apíchaka. Ila'aniña inakuwá kajrú la'akaño ke, Tupana puráka'alo lana'akéjami kemakale:

“Unká Tupana wátala kajrú la'akaño nanakuwá.

Eyá unká la'alaño nanakuwá kajrú we'epíkaño ke ajopánajlo, ñathé ra'á,

palá ripechu i'imakale nanaku”,

ke rimaká. ⁶Ñakele ila'aniña inakuwá kajrú wani we'epíkaño ke ajopánajlo, ichaje wani we'epika Tupana i'imakale. Riká la'ajeri iká palá wani, riphájika rená chojé wakajé. ⁷Iyurí Tupánajlo piyukeja nakaje iwó ka'akaro wa'até, ñakeja wani ra'akale rinakojó iká.

⁸Amá ikó palá. Kapechú kaja i'imá kajmuruna ke, ipiná Jiñá Chi'inárikana kulákale iká, rila'akáloje iká chapú. Yawi, eja'awá e'iyowaje, kulaka rijwána'apa, ke kaja rikulákale iká. ⁹Iyuríniña ichó Jiñá Chi'inárikanajlo, richá'ataka piyá iká. Ila'á kaphí ipéchuwa Tupana chojé; richojé itára'o kamachá rijló, ñaké waja piyuke eja'awá chuwa Jesucristo ja'apiyá jema'ajeño amaka chapú kaje yajwé. ¹⁰Ilé keja ijña'ajika chapú kaje yajwé panaku meketánaja, rejomi Tupana la'ajé ipechu palá, ipechu i'imakáloje kaphí richojé, riwátaka ke penaje. Íki'ija wani Tupana wátaka weká, ñakele ra'apiyá jema'ajeño i'imajeño matajnako rijwa'até je'echú chu. ¹¹Piyuke la'ajerí wani Tupana; ñakeja wani riwe'epíjika piyukeja nakaje la'akana. Ñaké ri'imajika.

Kaja penaje Pedro kemakare nakú yukuna marí

¹²Silvano wa'até nulana'á marí ijlo, no'owé ke riká nojló. Rimaká nakaje nakú ke la'ajerí riká. Metajlánija nulana'aká ijlo riyukuna. Richu nula'á jenakú; richu kaja nu'umá ijlo palá

wani Tupana la'aká iká yukuna, íki'ija wani riwátakale iká. Ila'á ipéchuwa kaphí ra'apiyá i'imakana nakú.

¹³Tupana i'iwapakárena rijluwa iká, ke kaja Jesucristo ja'apiyá jema'ajeño, Babilonia te'eré e i'imakaño. Néká kemaño inaku: “Eko palá najló ka'ajno”, ke. Ñaké kaja Marcos, nu'urí ke nojló i'imakare, kemaká inaku: “Eko palá najló ka'ajno”, ke. ¹⁴Íki'ija Jesucristo ja'apiyá jema'ajeño wátaka pekowáaka, ñakele ajalaka pekowáaka palá. Nuwata Tupana la'aká ipechu palá.

Kaja.